

La profession Ecclesiastique fut le premier objet de ses vœux; & de ses desirs, il trauailla fortement pour la meriter, & l'ayant embrassée il l'esprouua fauorable à sa personne par les dignitez qui luy furent conferées. L'Euesché de Rhodéz luy fut donné enuiron l'an 1361. il le gouuernoit encore en 1364. lors qu'il fut transferé à celuy d'Avignon, & en 1385. il fut fait Administrateur perpetuel de l'Abbaye de Montmajour, proche d'Arles. Robert de Geneve qui tenoit son Siege en la ville d'Avignon, & qui connoissoit les merites & les vertus de l'Euesque Faidit d'Aigrefueille, l'honora du Cardinalat, sous le Tiltre des Saints Syluestre & Martin des Montagnes, à la quatriesme promotion qu'il fit en la mesme ville le 10. des Calendes de Ianuier l'an 1389. & le sixiesme de son pretendu Pontificat: mais il ne iouït qu'enuiron trois ans d'un honneur si considerable & si releué, pendant lesquels nous ne trouuons point qu'il ait esté employé en aucunes affaires du saint Siege, quoy qu'il vescu en vn temps de troubles & de diuisions, qui auoit besoin de grands Hommes pour l'extinction du schisme cruel qui troubloit l'Eglise, ce qui me fait croire qu'il consumma le reste de ses iours dans la pieté prés de la personne de son Bien-facteur, parce qu'il mourut en la ville d'Avignon le 6. des Nones d'Octobre de l'an 1391. il receut les honneurs de la sepulture dans la Cathedrale de la mesme ville, sous vn Tombeau, sur lequel il est representé en vne forme semblable à celle qui se void cy-dessus, mais sans Epitaphe, au lieu duquel il y a vne inscription attachée contre la muraille, proche le sepulchre du Pape Benoist XII. qui marque le lieu de son inhumation, & porte precisément que Faidit d'Aigrefueille mourut sous l'obeissance de Robert de Geneve, qui l'auoit fait Cardinal.

